

**Aalisartunut qaleralinnik paggatassiilluni aalisarsinnaanermik akuersissuteqartunut angallatip annerpaaffissaanik piumasaqaat 9 miiterimut qaffanneqassappat, aalisartunut inuiaqatigiinnullu sunniutissai pillugit Naalakkersuisut misissueqqullugit peqquneqarnissaanik inatsisartut aalajangiiffigisassaattut siunnersuut. Misissuinermit inernerit kingusinnerpaamik UPA2023-imi inatsisartunut agguanneqassapput.**

(Siumup Inatsisartunut ilaasortaaitai)

### **Akissuteqaat**

(Aalisarnermut Piniarnermullu Naalakkersuisoq)

### **Siullermeenera**

Naalakkersuisut siunnersuuteqartut, Siumup Inatsisartunut ilaasortaaitai, paggatassiilluni qaleralinniarnermi angallatip annerpaaffissaa 9 meterimut qaffanneqarpat aalisartunut inuiaqatigiinnullu qanoq kinguneqarnissaanik nalilersuinissamik Naalakkersuisut peqquneqarnissaat pillugu Inatsisartut aalajangiiffigisassaattut siunnersuutaat pillugu qutsavigaat. Kingunissanik nalilersuineq kingusinnerpaamik UPA2023 tunniunneqassaaq.

Naalakkersuisuni immami isumannaallisaaneq pingaartipparput. Isumannaallisaaneq qaffassissoq pitsaanerpaamik sulinermit avatangiiseqarnissamut sulilluarnissamullu pisariaqarpoq. Aalisarnek sapinngisamik qaffasinnerpaamik isumannaallisaalluni ingerlanneqartariaqarpoq. Taamaammat aamma isumaqarpugut suliniutinik immami isumannaallisaaneq pitsaangortinniarlugu kingunissaanik tapersiisinnaasunik nalersuinissaq naleqqulluinnartuusoq.

Qaleralinniarneq Kalaallit Nunaata Avannaani sumiiffinni tamani inuuniarnermi amerlaqisunut pingaaruteqarluinnartuuvoq. Sumiiffinni ilaqutariippasuit aalisarnermit tassanga pingaarnertut isertitaqartarput, amerlasuullu isertitatik inuussutissarsiutinut allanut tapitut atortarpaat, assersuutigalugu piniarnermut. Aalisarnek innuttaasunut amerlaqisunut pingaaruteqarmat aqutsinermit allannguinerit innuttaasunut amerlasuunut annertuunik kinguneqarsinnaapput. Taamaammat isumaqarpugut taamatut allannguinermit aalisartunut inuiaqatigiinnullu kingunissai sukumiisumik erseqqissarnissaat pingaartuusoq. Suleqatigiilluta aalisartunut aamma Kalaallit Nunaata siunissaanut pitsaanerpaanik aalajangiinissatsinnut tamanna tungaviuvoq.

Paggataassilluni aalisarnek pillugu Aalisarnek pillugu Ataatsimiititaliar-suup inassuteqaatai tamarmik nalunngereerunnarsilerpaat. Tamannali maannakkut oqallisigissanngilarput, Naalakkersuisullu sapinngisamik aalisartunut qaleralinnik paggatassiilluni aalisarsinnaanermik akuersissuteqartunut angallatip annerpaaffissaanik piumasaqaat 9 miiterimut qaffanneqassappat kinguniusinnaasut tamaasa nassuiaatissami nassuiassavaat.

Naalackersuisut nassuiaatip kissaatigineqartup suliarinissaanut tunniunnissaanullu  
qilanaarput.

Nassuiaatip suliarinissaanut atuinissamut missingiutinut tunngatillugu  
oqaaseqaatissaqanngilagut.

Naalackersuisut taamatut oqaaseqarlutik aalajangiiffigisassatut siunnersuutip  
akuerineqarnissaa inassuteqaatigaat.